

**Guan Eng cemburu kejayaan Johor
Utusan Online
September 29, 2011**

JOHOR BAHRU 28 Sept. - Tindakan Ketua Menteri Pulau Pinang, Lim Guan Eng memburukkan negeri ini kerana beliau cemburu dengan keupayaan Johor menarik banyak syarikat multinasional Singapura melabur di Iskandar Malaysia.

Timbalan Menteri Pelajaran, Dr. Mohd. Puad Zarkashi berkata, ini kerana sebaik sahaja Iskandar Malaysia dilancarkan beberapa tahun lalu, ramai ahli perniagaan dari republik itu melabur di koridor ekonomi tersebut.

Malah, sebelum kewujudan Iskandar Malaysia, ramai pelabur dari negara jiran itu telah melabur di kawasan perindustrian Pasir Gudang, Tebrau, Kulaijaya dan Senai.

"Ini sebenarnya yang dicemburui oleh Guan Eng dan bagi saya tindakannya itu berniat sabotaj dan tidak patriotik, tidak bertanggungjawab serta tidak bersikap kolektif.

"Sepatutnya sebagai Ketua Menteri, dia tidak boleh bertindak sebagai pembangkang dalam menarik para pelabur asing ke negara ini kerana dia dan Pulau Pinang merupakan sebahagian daripada Malaysia," katanya diminta mengulas kenyataan Guan Eng yang didakwa memburukkan negeri Johor dalam satu temuramah dengan media asing di Singapura, baru-baru ini.

Beliau ditemui selepas merasmikan Persidangan Perwakilan Pengurusan Pendidikan Pengetua-pengetua Sekolah Menengah Johor di sini, malam tadi.

Mohd. Puad yang juga Ahli Parlimen Batu Pahat menegaskan, kedatangan dan kepercayaan pelabur asing itu menunjukkan Johor merupakan negeri yang selamat bukan sahaja bagi aktiviti pelaburan, malah untuk bercuti dan membeli-belah.

Beliau berkata, sepatutnya selaku pemimpin, Guan Eng wajar keluar daripada kotak pemikiran kepompong lama.

"Macam kita (kerajaan Persekutuan) apa juga dasar yang dilaksanakan semuanya jelas dan telus, terutamanya dalam usaha menarik para pelabur dan tidak pernah sekali-kali negeri-negeri dibawah pembangkang," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=0929&pub=Utusan_Malaysia&sec=Politik&pg=po_02.htm